

MATERA ANJA WAKITÀ UWANA YUHANA ATSETSÈR Première Lettre de Jean

Gay anja sifa

¹ Mètsetser à akul lakèl anja gay anja sifa, uwana agà la ahəŋ dagay la madzəka gudəŋ à vok. Mətsənəŋ, mənəŋəŋ la yewdi gami, ŋgaha mətsəkəla yewdi à gay, ŋgaha bay mədəbanì la ahəl gami aya. ² La mok uwana sifa uwaga adasa à waŋ à gudəŋ à vok, mənəŋəŋ, gay gə la uwaga məpəh à akul lakèl anja, ŋgaha məzəkulla sifa uwana adəv à gay aw, nekwa la slaka Zəzagəla, Baba gami, sifa uwatà apəhanula vok la paraka. ³ Tatak uwana mənəŋəŋ, ŋgaha la uwana mətsənəŋ, mətapakulla, kà akul anja magay tekula la maham gay à vok la abà, la Baba, ŋgaha la Kona anja Yesu Kristu. ⁴ Mètsetser à akul tatak uwanay kà anu anja mavalàh à zagəla la marabay.

Zəzagəla kà masla ufaka

⁵ Aganay uwana Yesu atəpanula, ŋgaha uwaga la uwana mətapakulla babay, Zəzagəla kà ufaka, tetuwa mələs la ahəŋ la masla la abà aw. ⁶ Baŋa məgodəy kà mədahama gay à vok la masla, ama mēda à huma à gay la madz à ahəŋ la mələs la abà kà, mədadəh fida la gay la abà, ŋgaha

la sləray la abà. ⁷ Ama baŋa mədza à ahəŋ la uɖaka la abà, bokuba uwana Sufəl gami adza à ahəŋ la uɖaka la abà, anu la maham gay à vok la azladza anik, kiya uwaga kà, aŋiz aŋa Yesu, Kona aŋha, apalla tsakana gami gesina.

⁸ Baŋa: ‘Anu azlaməna tsakana aw’, məgod kà, mədàvavar gəl gami, ŋgaha kà dziriga la ahəŋ la anu la abà aya aw. ⁹ Ama baŋa məpəhla tsakana gami à Zəzagəla, məslala vok, məfa gəl à masla à afik. Kà uwana aɖahà sləray kà la tetəvi aŋha. Dziriga, adàmats tsakana gami ala, ŋgaha adàpalanula mawisiga gami ala gesina. ¹⁰ Baŋa: ‘Anu azlaməna tsakana aw’, mədapaka Zəzagəla ala bokuba masla fida, gay aŋha azlak anu aya aw.

2

Kristu kà masla mazlak anu

¹ Azlabəza gay ləv gulo, gətsetser à akul uwanay, kà akul aŋa maɖàh tsakana aya aw. Baŋa dza anik aɖàh tsakana, anu la masla mazlak anu anik, uwana nekwa la slaka Baba, Yesu Kristu, masla uwana dziriga, ² azlaka anu. Takəɖ masla kà madegolay tsakana gami. Aɖahà uwaga kà aŋami pəra aw, kà aŋa azladza gudəŋ à vok gesina, kà tsakana aŋatà aŋa mamats ala.

³ Kiya uwaga, baŋa məkəs mapəhay aŋha, kiya uwaga məsəl masla la dziriga. ⁴ Dza uwana: ‘Gəsəl Zəzagəla’, agod, ŋgaha akəs mapəhay aŋha aw, dza uwaga kà, masla fida, dziriga la ahəŋ la masla la abà aw. ⁵ Ama dza uwana afa mapəhay aŋha à ahəŋ la ləv, masla kà dza uwana la masal dziriga. Aganay masəlay uwana

apəhanula maham gay à vok gami la Zəzagəla. ⁶ Dza uwana agodfay la dazuwaya: ‘Gi la maham gay à vok la Zəzagəla la abà’, say adza à ahəŋ bokuba madz à ahəŋ aŋa Yesu.

Mapəhay mawga

⁷ Azlaməna gay ləv gulo, gətsetser à akul mapəhay mawga aw, kà uwana uwanay gətsetser à akul kà mapəhay maviyaga, kabəzàwwal uwaga dagay la madzəka. Mapəhay maviyaga uwaga kà gay Zəzagəla uwana katsanàwwàŋ. ⁸ La azlaskala anik gətsetsèr à akul, bokuba azlamapəhay mawga dziriga aŋha. Apəhla ala la Kristu la abà, ŋgaha apəhla vok ala la akul la abà babay. La hadfay, mələs aŋa madiy aŋha, ŋgaha udfaka dziriga aŋa maudfay adagay.

⁹ Dza uwana: ‘Gi la udfaka la abà’ agodf, ama adzedzin deda aŋha bà gotənaŋ kà, dza uwaga kà aga la mələs la abà aya. ¹⁰ Dza uwana awoya deda aŋha, adza à ahəŋ la udfaka la abà, masla aga la zlamtsa kà madukw dza anik à tsakana à abà aw. ¹¹ Ama dza uwana apəsew deda aŋha, adza à ahəŋ la mələs taɓadammaga la abà, ŋgaha asəl slaka uwana aday aw, adapaka guləf.

¹² Azlabəza, gətsetser à akul uwanay kà, kà uwana tsakana aŋkul adàmatsila. Zəzagəla adàmatsakullaŋ ala kà uwana Yesu avà gəl aŋha kà aŋkul. ¹³ Azlababa gətsetser à akul, kà uwana kasəlaw masla agà la ahəŋ dagay madzəka. Azlabəza kohana, gətsetser à akul kà uwana kadùwàw seteni.

¹⁴ Azlabəza gətsetser à akul kà uwana kasəlaw Baba. Azlababa, gətsetser à akul kà uwana kasəlaw masla agà dagay la madzəka. Azlabəza kohana, gətsetser à akul kà uwana akul azlandzəda ndzəda, ngaha gay Zəzagəla aga la akul la ahàl, ngaha babay kà uwana kadùwàw seteni.

¹⁵ Kawoyaw gudəŋ à vok aw, kawoyaw azlatatak uwana la gudəŋ à vok la abà babay aw. Masal aŋa Baba Zəzagəla aga la ləv aŋa dza uwana la tsəh, awoya gudəŋ à vok aw. ¹⁶ Kəla tatak uwana aŋa gudəŋ à vok, kà madzugway mawisiga aŋa sləb vok, makəf yewdi à uwana à vok mənəŋəŋ kà maβəzal, magay zlapay lakəl aŋa uwana məkoray, azlatatak uwaga gesina kà, tatsa à waŋ kà la slaka Baba Zəzagəla aw, ama tatsa à waŋ kà la gudəŋ la vok pəra. ¹⁷ Gudəŋ à vok uwanay kà, masla la uwaga adəv à gay. Ngaha kəla tatak uwana dza adzugway la gudəŋ la vok, adədəv à gay babay suwaŋ. Ama dza uwana adəh uwana akəs à Zəzagəla à gəl kà, adədza à ahəŋ aŋa koksikoksi.

Masla məzam aŋa Kristu

¹⁸ Azlaməna gay ləv gulo, makəf gəl à ahəŋ kà adəgay nekwa nekwa. Katsənàw uwana tapàh kà: Leri masla məzam aŋa Kristu atsa à waŋ. Ama lagonay, aŋuvaw azlaməna məzam aŋa Kristu tasàhàh à waŋ, haday. Uwana apəhanula kà, makəf gəl à ahəŋ kà nekwa nekwa. ¹⁹ Tetuw tetuw, azladza uwaga taga la akul la dziriga aw. Kà uwaga à uwana, tasak anu vok ala. Haday ndzer, agayŋa tagay la anu kà, naka tadza à ahəŋ la anu. Ama taga azlaaŋami kà aŋa gay gà pəra,

gay gà la uwaga tasaka anu à ahəŋ kà uwaga aŋa madzədla kà baməraka tekula aŋatà kà, adəb à anu à vok aw.

²⁰ Kà aŋkul kà, kabəzàw Masasəfok Zəzagəla. Kristu adzadzàb akul à gəl, kà uwaga à uwana kasəlaw dziriga gesina. ²¹ Baŋa gətsetser à akul kà, kà uwana kasəlaw dziriga, awkà kà uwana kasəlaw dziriga aw aw, ama gətsetser à akul kità kà, kà uwana kasəlaw babay, fida atsa à waŋ la dziriga la abà, tetuwa aw.

²² Uwa à masla fida uwa? Dza uwana agoɗay la paraka kà: Yesu kà Kristu aw. Dza uwaga la uwana, masla məzam aŋa Kristu, masla akweska atà səla nna, Baba Zəzagəla atà la Kona aŋha. ²³ Haɗay, kà dza uwana akweska Kona, kà akweska Baba babay aya. Kà aŋa dza uwana asəl Kona kà, aga la Baba babay suwaŋ.

²⁴ Ama akul katsənaw uwaga dagay madzəka, tatak uwanay kasàkàwwal adza à ahəŋ la akul la abà. Baŋa tatak uwana katsənàwwaŋ dagay madzəka adza à ahəŋ la akul la abà, kà akul babay kadzaw à ahəŋ la Kona la abà, ŋgaha la Baba la abà babay suwaŋ. ²⁵ Aganay tatak uwana Kristu apəh à anu à ahəŋ, kà mav à anu sifa uwana adəv à gay aw.

²⁶ Gətsetser à akul tatak uwanay, kà lakəl aŋa azladza uwana tayàh mavavar akul. ²⁷ Baŋa kà aŋkul kà, Kristu adadzàb à akul Masasəfok tsikasliga aŋha à gəl, kà Masasəfok uwaga aŋa madz à ahəŋ la akul la abà, akul kà manəkudfa aŋa matapakulla tatak aŋa dza aw. Haɗay ndzer, Masasəfok Zəzagəla atapakulla azlatatak gesina. Uwana Masasəfok apahla ala kà dziriga,

awkà fida aw. Gay gà la uwaga, məkəs uwana Masasədok atapànula, uwaga asal magoday: Dzàw à ahəŋ tekula la Kristu.

²⁸ Iyay, azlabəza gay ləv gulo, dzàw à ahəŋ la Kristu la abà, kà aŋami kà mөгəɗaŋ à afik, ndzer baŋa adàwul à waŋ, kà ləv gami aŋa mahənla la ziruwī, la huma aŋha, la mavakay uwana adàwul à waŋ aw. ²⁹ Kasəlaw kà Kristu kà dziriga, kità babay kà, kəla dza uwana akəs, uwana akəs dziriga kà, masla kà dziriga babay suwaŋ, dza uwaga kà, masla dza aŋa Zəzagəla.

3

Azlabəza aŋa Zəzagəla

¹ Nəŋàw mawoy anu aŋa Baba tsi, mawoyəŋ aŋha aga la ahəŋ kaykay, azaləkulla azlabəza aŋha, ŋgaha uwaga kà dziriga, anu azlabəza aŋa Zəzagəla. Baŋa gudəŋ à vok awoya akul aw kà, kà uwana asəl Zəzagəla babay aw. ² Azlaməna gay ləv gulo, lagonay kà, anu azlabəza aŋa Zəzagəla adagay. Ama Zəzagəla adapəhla ala la dazuwaya dadəŋ à uwana mədàbəzal vərđi anik, aw. Ama mədàbəza uwaga la kaslà uwana Kristu adapəhla gəl aŋha ala la paraka, mədəgay kiya masla, kà uwana anu mədənəŋəŋ huɗ adi aŋha la yewđi gami. ³ Kəla dza uwana asal manəŋ Kristu, say aɗehəŋ haŋkəli, kà masla aŋa madəbani tsakana aw, kiya uwaga kagaw sətaka, bokuba Kristu uwana sətaka babay.

⁴ Kəla dza uwana aɗehəŋ kà tatak mawisiga pəra, uwala aɗàh mapəhay aŋa Zəzagəla aw, akweska mapəhay aŋa Zəzagəla, kà masla aŋa

madàh tsakana. ⁵ Ama kasəlaw kà, Yesu, Sufəl gami asà à waŋ à gudəŋ à vok, kà mazəb tsakana à azladza la kəl ala. La masla la abà kà, tsakana la ahəŋ aw. ⁶ Kəla dza uwana adza à ahəŋ kà la masla la abà kà, adàh azlatatak mawisiga aya aw, ŋgaha dza uwana ada à humà à gay la madàh azlatatak mawisiga kà, adanəŋ Kristu la tetuw tetuw aw. Asəl masla dīkidiki aw.

⁷ Azlabəza gulo kavàw vok aŋkul à azladza tapapat akul aw! Dza uwana adàh dziriga, masla kà dziriga babay suwaŋ, bokuba Kristu uwana dziriga. ⁸ Dza uwana ada à humà à gay la madàh azlatatak mawisiga, masla kà aga la ahəl aŋa seteni; seteni kà akweska Zəzagəla dagay madzəka, Kona aŋa Zəzagəla asà à waŋ, kà masla makalàh tatak uwana à ahəŋ, seteni adahəŋ.

⁹ Dza agay bəzi aŋa Zəzagəla la mayyi vok mawga, dza uwaga aslala vok aŋa madàh azlatatak mawisiga aya aw, kà uwana ndzəfa aŋa Zəzagəla, uwana ayyà vok mawga, adza à ahəŋ la masla la abà, aslala vok kà madahàh azlatatak mawisiga aya aw, kà uwana adapaka kona aŋa Zəzagəla. ¹⁰ Dza uwana adàh tatak uwana dziriga aw, ŋgaha awoya deda aŋha aw, dza uwaga kà kona aŋa Zəzagəla aw, aŋa seteni. Azlasləray aŋatà tapəhanula la paraka, kà uwana tavàhla la Kona aŋa Zəzagəla, kà atà azlaaŋa seteni.

Wòyàw vok kà akul à akul

¹¹ Hadfay dziriga, uwana katàpawla teraŋa kà: Wòyàw vok kà akul à akul, tatak uwaga kà

kadatapawla dagay madzəka. ¹² Kità kà, dza anəfa tsəhay gə aŋa Kaynu aw, kà uwana masla kà agə kona aŋa seteni, akəǝf deda aŋha. Kà mana akəǝf deda aŋha ma? Kà uwana Kaynu adahàhà azlatatak mawisiga. Ama tatak uwana deda aŋha adahàhàŋ agàhàh dziriga.☆

¹³ Azladede, ləv aval akul à gay à baŋa azlaməna gudəŋ à vok uwanay tapəsew akul aw. ¹⁴ Ama məsəl kà mədasa à uda la mamətsay la abà, ŋgaha mədada à sifa à abà. Gay gə la uwaga à uwana məslala vok kà mawoy azladede gami. Dza uwana awoya deda aŋha aw kà, aga la ahəl aŋa seteni. ¹⁵ Kà aŋa dza uwana awoya deda aŋha aw kà, masla makəǝf dza haday, adəbəza sifa adəv à gay aw, tetuw tetuw aw. ¹⁶ Yesu Kristu kà, avà sifa aŋha kà aŋami, uwana adahəŋ kà, masla mapəhanula mawoyəŋ dziriga. Kità kà, anu babay məvə sifa gami kà aŋa azladede gami suwaŋ zlà. ¹⁷ Baŋa dza gorobu anəŋa deda aŋha la kuǝa la abà, ama asal mazlakay aw, kakay dza uwaga agodfay kà: ‘Gəwoya Zəzagəla la ləv gulo’, agodfay ma? ¹⁸ Azlabəza gulo, asla kà magodfay ‘Gəwoyaŋ’, pəra aw, kapahaw azlagay namnamga pəra aw, masal dziriga kà apəhla vok ala kà la uwana la abà mədəhəŋ.

Guba akəs anu aw

¹⁹ Aganay à tatak uwana apəhanula kà manəf tetəvi aŋa dziriga. Ŋgaha aganay tatak uwana apəhanula kà guba aŋa makəs anu, kà mad à huma Zəzagəla aw. ²⁰ Haday, baŋa ləv gami

☆ 3:12 3.12 1Musa 4.8

apuwa à anu gudzi à gəl, məsəl kà Zəzagəla gami kà aduwà ləv gami, ɲgaha məsəl babay kà, masla gami asəl tatak gesina. ²¹ Kità kà, azlaməna gay ləv gulo, baɲa ləv gami apuw à anu gudzi à gəl aw, guba akəs anu kà mad à huma Zəzagəla aw. ²² Zəzagəla kà adavà à anu tatak uwana mənāvay gesina, kà uwana mədàh tatak uwana: ‘Dahàwwàŋ’, masla agòd, la uwana akəsəl à gəl. ²³ Aganay tatak uwana: ‘Dahàwwàŋ’, agòd: Fàw madzugway aɲkul à Kona aɲha Yesu Kristu à afik, ɲgaha wòyàw vok akul à akul, bokuba uwana Kristu apèh à anu. ²⁴ Dza uwana akəs mapəhay aɲa Zəzagəla, ɲgaha adàdah slaka madz à ahəŋ aɲha à ahəŋ la ləv aɲha la tsəh, masla adàdza à ahəŋ la masla la abà. Uwaga kà Masasədok uwana Zəzagəla avà à anu à uwana apèh à anu, Masasədok uwaga aga la ləv gami la tsəh.

4

Azlaməna matapla mawisiga à azladza

¹ Azlaməna gay ləv gulo, kafaw madzugway aɲkul à azladza uwana à afik gesina: ‘Anu la Masasədok uwana atsà à waɲ la slaka Zəzagəla’, tagod aw. Ama nərəzàw atà dadàŋ, kà akul aɲa masəl: atà la Masasədok aɲa Zəzagəla ndzer. Hadfay ndzer, azlaməna mapəh à atà gay ahəl fidaga la ahəŋ, uwana tadàsa à waɲ à gudəŋ à vok, taslèh gəl à ahəŋ gesina. ² Aganay tetəvi uwana kasəlawla à baɲa dza uwaga la Masasədok aɲa Zəzagəla ndzer. Kəla dza uwana agodfay kà: ‘Yesu kà Kona aɲa Zəzagəla, asà à

gudəŋ à vok, apakà dza bokuba anu', dza uwaga kà, akor kà Masasədok, uwana atsà à ahəŋ la slaka Zəzagəla. ³ Ama kəla dza uwana agoɗay kà: 'Yesu kà Kona aŋa Zəzagəla aw, ŋgaha ndzer apakà dza bokuba anu aw', dza uwaga aga la Masasədok uwana asà à ahəŋ la slaka Zəzagəla aw. Ama dza uwatà kà la masasədok aŋa masla məzam aŋa Kristu. Haɗay, katsənàwwàŋ kà masla adàsa à waŋ. Lagonay kà, mədanəŋəŋ la gudəŋ la vok adagay zlà.

⁴ Ama kà aŋkul azlabəza gay ləv gulo, akul azlaaŋa Zəzagəla, ŋgaha kaɗùwàw azlaməna mapəh à atà gay à ahəl fidaga uwaga. Masasədok Zəzagəla uwana aga la akul la abà aɗuwa masasədok aŋa azladza uwaga tetuw tetuw, kà uwana aŋatà kà aŋa gudəŋ à vok uwanay. ⁵ Azladza uwaga tapəhay kalkal la gudəŋ à vok uwanay, kà uwaga tapəhay lakəl aŋa gudəŋ à vok uwanay, ŋgaha gudəŋ à vok akəs gay aŋatà. ⁶ Ama anu, anu azlaaŋa Zəzagəla, kəla dza uwana asəl Zəzagəla, atsəb à anu sləm, ama kà aŋa azlauwana azlaaŋa aŋha aw, tatsəb à anu sləm aw. Kiya uwaga à tetəvi kà masəlay Masasədok dziriga aŋa Zəzagəla, ŋgaha masasədok mazila, kà kità ndzer.

Zəzagəla masla mawoyəŋ

⁷ Azlaməna gay ləv gulo, məwoya vok kà anu à anu. Kà uwana masal kà atsà à ahəŋ kà la slaka Zəzagəla, ŋgaha kəla dza uwana awoyaŋ deda aŋha kà, masla kona aŋa Zəzagəla, ŋgaha asəl Zəzagəla. ⁸ Dza uwana awoyaŋ Zəzagəla aw, masla asəl Zəzagəla aw, tekeɗika Zəzagəla masla

mawoyəŋ. ⁹ Kiya uwaga à uwana, Zəzagəla apəhanula masal aŋha: Asləl Kona aŋha tekula gə uwatà à waŋ à gudəŋ à vok, kà masla aŋa mav à anu sifa adəv à gay aw. ¹⁰ Godega aŋa mawoyəŋ uwanay kà, Zəzagəla awoya anu, asləl à anu Kona aŋha à waŋ, kà aŋa mapis à anu gay à vok, ŋgaha amatsàn tsakana gami ala. Anu la uwana məwoyəŋ Zəzagəla teraŋa aw, ama masla la uwana atsà à vok à mawoy anu dadəŋ.

¹¹ Azlaməna gay ləv gulo, bokuba uwana Zəzagəla awoya anu kaykay kà, say məwoya vok kà anu à anu babay suwaŋ. ¹² Dza la ahəŋ adanəŋ Zəzagəla didi aw, ama baŋa məwoy vok kà anu à anu, Zəzagəla adza à ahəŋ la anu, ŋgaha azladza tanəŋəŋ la paraka masal aŋa Zəzagəla, uwana la anu la abà.

¹³ Kiya uwanay la uwana, anu la maham gay à vok la Zəzagəla, masla adza à ahəŋ la anu la abà, masla avà à anu Masasəfok aŋha. ¹⁴ Mənəŋəŋ, ŋgaha məpəh uwaga la kuda zləkkà: Baba asləl Kona aŋha à waŋ à gudəŋ à vok, kà masla aŋa məbəl anu. ¹⁵ Kəla dza uwana apəhay la paraka kà Yesu kà: Kona aŋa Zəzagəla kà, masla adza à ahəŋ la Zəzagəla la abà. ¹⁶ Anu məsəl masal uwana Zəzagəla awoya anu, ŋgaha mədakəs masal uwaga.

Zəzagəla masla masal. Dza uwana aga la masal uwaga la abà, masla la maham gay à vok gə la Zəzagəla, ŋgaha Zəzagəla la masla la abà bay. ¹⁷ Aganay tatak uwana apəhanula kà masal aŋa Zəzagəla mahənlaga la anu la abà, guba akəs anu, kà kaslà aŋa seriya aw,

kà uwana sifa gami adagay magagazlölaga la aṅa Yesu Kristu. ¹⁸ Dza uwana adakəs masal ndzer, dza uwaga, guba azəṅ đikidiki aw, masal dziriga ahəlal guba la vok ala. Ama dza uwana guba azəṅ kà mahənlaga la masal aw, kà uwana guba kà tatak tekula la seriya. ¹⁹ Ama anu kà, məwoya Zəzagəla, kà uwana Zəzagəla atsà à vok à mawoy anu teraṅa. ²⁰ Dza uwana agoḏay: 'Gəwoya Zəzagəla', awoya deda aṅha aw, dza uwaga kà: Masla fida. Kayyà, kakay awoya Zəzagəla à masla uwana anəṅaṅ aw ma, ṅgaha kà awoya deda aṅha uwana anəṅaṅ la yewdi aw ma? ²¹ Uwanay kà mapəhay uwana Yesu apəh à akul: Dza uwana awoya Zəzagəla, say awoya deda aṅha babay suwaṅ.

5

Madiṅal gəl à vok gami aduwa gudəṅ à vok

¹ Kəla dza uwana adiṅal gəl à vok, kà Yesu kà dza, uwana Zəzagəla afəl dzakwa à gəl, agoḏay kà, masla kà mayyay aṅa Zəzagəla. ṅgaha kəla dza uwana awoya Baba, awoya mayyay aṅha babay suwaṅ. ² Kakay məsəlay kà masal gami la ahəṅ, anu azlabəza aṅa Zəzagəla la dziriga ma? Baṅa məwoya Zəzagəla la gəl aṅha, ṅgaha à baṅa məḏàh uwana masla apəhanula. ³ Ndzer, dza uwana awoya Zəzagəla, masla kà adah tatak uwana masla apəhla ala babay. Uwana Zəzagəla apəh à akul kà, zlazlada aw. ⁴ Haḏay, kà uwana dza uwana mayyay aṅa Zəzagəla aslala vok kà maḏuw gudəṅ à vok. Tetəvi uwana aduwa gudəṅ à vok kà, uwaga kà madiṅ gəl à Yesu

Kristu gami à vok. ⁵ Uwa aslala vok aṅa maḍuw gudəṅ à vok uwa? Say dza uwana akès Yesu Kona aṅa Zəzagəla.

Sayda lakəl aṅa Yesu Kristu

⁶ Yesu Kristu kà masla uwana asà à waṅ. Asà à waṅ la iyaw aṅa batem aṅha, ṅgaha la aṅiz aṅa mamətsay aṅha bay. Agà maḍahalla batem gà la iyaw pəra aw, ama la aṅiz aṅa mamətsay aṅha bay. Masasəḍok tsikasla aza sayda lakəl aṅha kà uwaga dziriga, kà uwana Masasəḍok aṅa Zəzagəla kà masla fida aw. ⁷ Kità kà, tatak makər la ahəṅ à uwana taza sayda aṅha. ⁸ Masasəḍok tsikasla, la iyaw ṅgaha aṅiz aya. Azlatatak makər uwaga kà tapəhanula lakəl aṅa tatak dziriga tekula: Yesu kà, masla Kristu, Kona aṅa Zəzagəla. Masla uwana apakà dza. ⁹ Məkəs uwana azladza taziṅ, ama uwana Zəzagəla apəh kà, aḍuwa gay aṅa azladza uwana tapəh. Aganay uwana Zəzagəla apəh lakəl aṅa Kona aṅha Yesu: ¹⁰ ‘Dza uwana adiṅ gəl à Kona aṅa Zəzagəla à vok, abəza sayda uwaga la ləv aṅha la tsəh. Ama dza uwana adiṅ gəl à Zəzagəla à vok aw, apaka Zəzagəla ala kà masla fida. Kà uwana akès sayda aṅa Zəzagəla uwana masla afà à gəl aṅa Kona aṅha aw.’ ¹¹ Mana gay uwaga agodf à anu ma? Zəzagəla avà à anu sifa adəv à gay aw, sifa uwaga kà avà à anu, kà la Kona aṅha la abà. ¹² Dza uwana la Kona, masla la sifa uwaga, ama dza uwana la Kona aṅa Zəzagəla aw kà, masla la sifa mawga aw.

Sifa uwana adəv à gay aw

¹³ Gøtsetser à akul, kà akul aṅa masəlay kà, akul kà, akul la sifa uwana adəv à gay aw, ndzer, kà uwana kadiṅàw gəl à sləm aṅa Kona aṅa Zəzagəla à vok. ¹⁴ Aganay makəs vok aṅa uwana məslala vok aṅa maz à vok à slaka Zəzagəla. Guba akəs anu aw, kà uwana məsəl kà, baṅa mənava tatak à masla la tetəvi aṅha, kà masla: 'Ayyà', agodf à anu. ¹⁵ Kà uwana məsəl kà atsəb sləm à baṅa mənawal tatak la matsizl à afik ndzer, uwana mənawal kà, adàvə à anu, ndzer.

¹⁶ Baṅa dza anəṅa deda aṅha anik adfah tsakana, uwaga adala à mamətsay aw, dza uwaga adəv kudfa kà aṅa deda aṅha uwaga, ṅgaha Zəzagəla adàbasallaṅ la mawal sifa. Tatak uwaga kà ndzer, kà aṅa tsakana uwana adala dza à mamətsay aw pəra. Tsakana uwana adala dza à mamətsay la ahəṅ. Gənava akul, kà akul aṅa madəv kudfa lakəl aṅa tsəhay tsakana uwaga aw. ¹⁷ Dəwdəw tatak uwana kadfahawwaṅ la tetəvi uwana Zəzagəla apəh aw, uwaga gesina kà tsakana. Ama azlatsakana la ahəṅ, uwana tadala dza à mamətsay aw.

¹⁸ Məsəl kà mayyay aṅa Zəzagəla kà, adfah tsakana aya aw, kà uwana Kona aṅa Zəzagəla anəṅla, ṅgaha ndzəda aṅa seteni la ahəṅ lakəl aṅha aya aw.

¹⁹ Amiyaka gudəṅ à vok gesina la ahəl aṅa seteni kà, ama anu kà, anu azlaməna huɗ gəy aṅa Zəzagəla.

²⁰ Məsəl babay kà Kona aṅa Zəzagəla asà à waṅ à gudəṅ à vok. Masla avə à anu matsihila, kà anu aṅa məsəl Zəzagəla la dziriga. Anu

mədahama gay à vok la Zəzagəla la abà la dziriga, kà madegolay Kona aṅha Yesu Kristu. Yesu Kristu kà masla Zəzagəla la gəl aṅha, masla bay sifa, uwana adəv à gay aw.

²¹ Azlabəza gay ləv gulo, dəhàw haṅkəli kà azlamazlazlay fidaga.

**Wakità Zəzagəla Wakitə Anja Makəs Vok
Slawda Mawga (Cameroun)
Matal: Wakitə Zəzagəla Wakitə Anja Makəs Vok
Slawda Mawga (Cameroun) (New Testament)**

copyright © 2019 Wycliffe Bible Translators, Inc.

Language: (Matal)

Contributor: Wycliffe Bible Translators, Inc.

All rights reserved.

2020-11-18

PDF generated using Haiola and XeLaTeX on 21 Feb 2024 from source
files dated 29 Jan 2022

03efbf2f-98ca-5534-8610-0be3a8c4b974